

TE HEHEURAA API

»»»»»
TENUARE 1940

OAOA I ROTO I TE MATAHITI APÎ

IA ORA NA outou atoa i teie Matahiti Apî ! Ia oaoa a'e outou i te matahiti e haere mai nei i te mau matahiti i mairi a'enei ia outou, e ia riro te reira oaoa e te maitai ei *hau atu i te mau ite atoa*.

Nafea te hoê e tiaturi, e a ore râ, e titau i taua huru oaoa e taua maitai ra ? Tei pihai noa iho te reira i te taata mai te mea e imi oia i te reira ? No te taatoa anei, e a ore râ no te vetahi ana'e ra ? A tai'o ana'e na tatou i tei papaihia i roto i te parau mo'a no nia i taua vahi ra.

Ua parau atura te vaha o Petero, Ua ite mau atura vau e ore te Atua e haapao i te huru o te taata. O tei mata'u ra ia'na, e o tei rave i te parau-tia i te mau fenua atoa ra, o te itehia mai ia e ana. Ohipa 10:34, 35.

E mata na râ outou i te imi i te basileia o te Atua, e te parau-tia na'na; e amui-atoa-hia mai taua mau mea ra ia outou. Mataio 6:33.

Te ohipa rahi na te taata, i to'na oraraa tahuti nei, o te horoaraa ia'na te ravea no te maitiraa i rotopu i te maitai e te ino. *Ia rave oe i te parau maitai ra, eita anei e itehia mai? e aore i maitai ra, te vai ra te taraehara i te uputa na. Genese 4:7. E tena na, e haamana'o maitai na to aau, ia ite oe i teie nei mahana, e o Iehova ana'e ra te Atua, i nia i te ra'i, e i raro atoa i te fenua nei, aita'tu Atua, e teie nei, e haapao oe i ta'na mau haapaoraa, e ta'na mau ture, ta'u e parau atu ia oe i teie nei mahana, ia maitai hoi oe, e to tamarii atoa i muri a'e ia oe ra, ia haamaorohia to oe na pue mahana i nia i te fenua ta to Atua ta Iehova e horoa mai no oe, no oe roa'tu. Deuteronomi 4:39, 40. Inaha, ua tuu vau i te ora e te maitai, i te pohe e te ino, i mua ia oe i teie nei mahana; oia hoi teie ta'u e parau atu ia oe i teie nei mahana, ia hinaaro oe i to Atua ra ia Iehova, ma te haere maite na tana ra mau e'a,*

e te haapao i ta'na parau, e ta'na ra mau haapaoraa, e ta'na ra mau ture, e ora oe, e e ruhi roa oe: e haamaitai mai to Atua ra o Iehova ia oe, i nia i te fenua ta oe e haere e rave nei ei parahiraa. Deuteronomi 30:15-16. Ua tae hoi i te tau e tupu ai te pohe i te utuafare o te Atua nei: e e na o nei atu ia tatou nei te pohe i te tupu, eaha ra hoi te hopea o te feia aore i faaroo i te evanelia o te Atua ra? I Petero 4:17.

Ua horoahia i te taata te mana ia maiti i te maitai e a ore râ te ino; no reira, eita te Atua e faahepo i te taata ia rave i te maitai; eita atoa hoi oia e faatia ia Satane ia faahepo i te taata i roto i te hara. E mea tia roa i te taata ia maiti no'na iho e ia haavahia oia mai te au i ta'na mau ohipa.

E ao to te feia, o Iehova to ratou Atua. Salamo 144:15.

*Hinaaro oe i to Atua ia Iehova ma to aau atoa, e ma to varua atoa, e ma to mana'o atoa. * E aroha'tu oe i to taata-tupu, mai to aroha ia oe iho na. Mataio 22:37, 39. Ua hinaaro outou ia'u ra, e haapao i ta'u parau. Ioane 14:15.*

Ua tuuhia mai te taata i nia i te ao nei ia tia ia'na ia oaoa atoa i roto i to'na oraraa, i roto atoa i te taviniraa, e i roto i ta'na mau ohipa atoa. Aore hoi au i haama i te evanelia o te Mesia ra, no te mea, o te mana'ia o te Atua, ia ora te feia atoa i faaroo ra: te ati Iuda na e te Heleni atoa hoi. Tei reira hoi te parau-tia a te Atua i te faaiteraahia mai ei faaroo-raa, mai tei papaihia ra e, Te feia parau-tia i te faaroo ra, e ora ia. Ua faaitesia mai te riri o te Atua mai te ra'i mai, i te mau paieti ore atoa ra, e te mau parau-tia ore atoa a te taata nei, o tei tapea i te parau mau ma te tia ore ra. Roma 1:16-18. Ua faaitesia mai ia tatou, e te Atua o teie nei ao, te Fatu o Iesu Mesia, te e'a e noaa mai ai te îraa o te oaoa e te maitai; no reira, ia itehia tatou i te taviniraa ia'na na roto i te haapaoraa i ta'na mau faaueraa, e na roto atoa hoi i te haapaoraa i te mau ture a te Hau Farani: ia na roto i taua mau e'a ra e tia'i ia tatou ia faarahi i to tatou oaoa e to tatou maitai i teie matahiti e haere mai nei, ei reira e faaoioi ra tatou i te tau e tia'i ia tatou ia amui atu i to te ao i te haamaitairaa i te Atua, a parau atu ai, *Ia haamaitaia te Atua i nia i te ra'i teitei, ei hau to teie nei ao, e ia ite auhia mai te taata nei.* Luka 2:14.

TE PARAU AUTAHU'ARAA

No te Ava'e FEBUARE

TE MAU TAATA TUIROO O TE BIBILIA

E MAU UIRAA:

1. O vai teie taata ? 2. Eaha to'na toroa ? 3. Eaha te huru o to'na maitiraahia ? 4. Ihea ta'na ohipa i ravehia'i ? 5. Eaha te ohipa i oti ia'na ? 6. Ua mauruuru anei te mau taata ia'na ? 7. Ua mauruuru anei te Atua ia'na ? 8. E manuia anei tatou ia pee tatou ia'na ? A tatara mai.

Febuare

4. ELIZABETA. Luka 1:5-60.
 11. ZAKARIA. Luka 1:5, 11-23, 40, 59-64, 67-79; 3:2 Mataio 23:35; Luka 11:51; Paraleipomeno 24:20.
 18. IOANE BAPETIZO. Luka 1:5-20, 59-79; 3:1-18, 21; 7:18; Malaki 3:1; 4:5, 6; Mataio 3:-13; 4:12, 17; 11:2, 14; 14:3; 17:10-12; Mareko 1:1-8, 14, 15; 6:17; 9:11-13; II Te Mau Arii 1:8; Ioane 1:29-32; 3:23-30; Isaia 40:3; Te Ohipa 19:3, 4.
 25. A haapii atu i te parau no na Haapii Hahaere no te avae i mua, mai tei papaihia i roto i te ve'a no Febuare.

Na Te Mau Maapii

Mahaere na te Mau Utuafare

Ia haamana'o maitai tatou i te ohipa rahi tei oti i te Mesia na roto i to'na Here rahi ia tatou nei, e tia'i. Peneia'e ia na reira tatou e tupu mai te itoitio apî ia tatou e e oti maitai a'e te haapaoraa i na ture e te rahi ta Iesu i tuu mai ia tatou, oia hoi, te parau no te aroha te tahi i te tahi.

Ua parau aturu Iesu, "Hinaaro oe i to oe Atua ia Iehova ma to aau atoa, e ma to varua atoa, e ma to mana'o atoa. O te ture matamua teie e te hau i te rahi. E mai te reira atoa te piti; E aroha'tu oe i to taata-tupu, mai to aroha ia oe iho na. Te ture atoa e te mau peropheta, tei teie nei ia pue ture e piti nei." Mataio 22:37-40.

I poia na hoi au, e ua horoa mai outou i te maa na'u; i poiha na vau, e ua faainu mai outou ia'u; e taata e au, e ua ite mai outou ia'u; i veve na vau, e ua faaahu mai outou ia'u; i pohe na vau i te ma'i, e ua utuutu mai outou ia'u; i roto vau i te tapearaa, e ua haere mai outou ia'u ra. . . O outou i na reira i te hoê taeae iti haihai roa i roto i tau mau taeae nei, ua na reira mai ia outou ia'u." Mataio 25:35, 36, 40.

TE SOTAIETE VAHINE TAUTURU

No te Ava'e FEBUARE
Irava tamau aau: Ioane 17:3

Teie hoi te ora mure ore, ia ite ratou ia oe i te Atua mau ra, e ia Iesu i te Mesia i ta oe i tono mai.

Mahana Maha (Matamua)

Mahana iritiraa mana'o e te himene na te mau tuahine.

Parau tumu na na tuahine hahere: Te Aroha.

E ore roa te aroha e mou. I Korinetia 13:8.

A tai'o atoa i te I Korinetia 13:1-13.

Ua parau te Peresideni ra o Iosepha F. Semita e, "O te aroha, oia hoi, te here, o te parau rahi roa e vai nei. Mai te mea e tia ia tatou ia faatoro atu i te rima tauturu i tei haavîhia, mai te mea e tia ia tatou ia tauturu atu i tei roohia i te ati e tei oto, mai te mea e nehenehe ia tatou ia mae'e te huru o te taata nei i nia e ia haamaitai i te reira, o ta tatou ia ohipa ia na reira tatou. O te hoê ia tufaa rahi no to tatou haapaoraa faaroo nei."

Mahana Maha (Piti)

Te mau haapiiraa a te Aposetolo ra o Paulo. Te Ohipa 26:22-32; 28.

Mahana Maha (Toru)

Ua tamau noa Paulo i ta'na mau haapiiraa. I Tesalonia pene 4 e te 5.

Mahana Maha (Maha)

Paulo te Maratiri. II Timoteo 4:1-18; II Korinetia 11:23-33; I Korinetia 15:30-33.

Ta Paulo ohiparaa i nia i te tâtîraa. I Korinetia 12:13; Kolosa 3:11.

Te Tautururaa a Paulo i te ao Cherisetiano.

E taata rohirohi ore o Paulo i te raveraa i te ohipa, e ua rave oia i te mau mea maere roa. Ua a'o teie aposetolo o te mau Etene i te evanelia i roto i na matahiti rii poto, mai Ierusalema i Iliriko, e mai reira e tae noa'tu i Roma. Ua riro o Paulo ei aposetolo no te tiamâ, no te paari o te ite. E here rahi to Paulo i te taata nei e i te evanelia atoa a te Mesia.

Mahana Maha (Hopea)

Mahana raveraa ohipa na te mau tuahine.

TE HAAPIIRAA SABATI

No te Ava'e FEBUARE

PUPU PARAIMERE

Irava tamau aau: *Ruta 1:16*

Eiaha oe e parau onoono mai ia'u e faarue ia oe e ia ho'i au i to'u nei peeraa'tu ia oe; te vahi ta oe e haere ra, e haere atoa ia vau; e te vahi ta oe e parahi ra, e parahi atoa ia vau; to oe ra nunaa, o to'u atoa ia nunaa; e to oe ra Atua, o to'u atoa ia Atua.

Febuare 4. To Dana ra fare idolo. Te Mau Tavana 17;18.

Febuare 11. Te vahi ta oe e haere, e haere atoa vau. Ruta pene 1.

Febuare 18. Te ohi-haere-raa o Ruta i te mau aua o Boaza. Ruta pene 2.

Febuare 25. Hi'opoaraa.

PUPU PITI

Irava tamau aau: *Genese 2:18*

Ua parau ihora te Atua ra o lehova, e ere ia i te mea maitai ia parahi noa Adamu oia ana'e ra; e hamani au i te tahi tauturu au na'na ra.

Febuare 4. Te aamu no te hamaniraa. Genese 1; 2:1-7.

Febuare 11. Adamu te metua paari. Genese 2:8-25; 3.

Febuare 18. Abela, tei horoa noa ma te tapitapi ore. Genese 4:1-17.

Febuare 25. Hi'opoaraa.

PUPU TORU e te MAHA

Irava tamau aau: *Genese 1:27*

Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra; i hamani oia ia raua, o te tane e te vahine.

Febuare 4. Adamu e te hamaniraa. Genese 1:24-30; 2:7, 21-25.

Febuare 11. Adamu raua o Eva i roto i te ô i Edene. Genese 2:8-25; 3:1-7.

Febuare 18. Adamu raua o Eva i roto i te mau peapea no teie nei ao. Genese 3:8-24; 4:1-2.

Febuare 25. Hi'opoaraa.

NO TE AVA'E FEBUARE

Irava tamau aau: *Luka 2:14*

Febuare 4. TE ANOTAU TIA MAU NO TO IESU TAERAA MAI.
Genese 32:28; 35:10; Ezera 1:1-4; Luka 2:1; 11:37-54; 20:46; Mataio 2:1; 22:15, 16; 23:8-10, 13-15, 23; Ioane 3:2; Te Ohipa 26:5-6.

Febuare 11. TO GABERIELA FAAITERAA NO TE TAERAA MAI O IOANE RAUA o IESU. Luka pene 1; Isaia 7:14; 9-6; Genese 12:3; 18:18; 22:18; 26:4; Te Ohipa 3:25; Galatia 3:8.

Febuare 18. TE AIÛ NO BETE-LEHEMA. Luka pene 2; Mata-
io pene 2.

Febuare 25. TE TAMAITI NO NAZARETA. Mataio 2:15-23; 12:46, 47; 13:55, 56; 21:11; Luka 2:40-52; 4:16-22; Mareko 6:2.

No te Ava'e FEBUARE

Irava tamau aau: *Salamo 117:1-2*

E haamaitai ia Iehova, e te mau nunaa e; e faateitei ia'na, e te mau tata atoa na. Hamani maitai rahi to'na ia tatou nei, e te parau mau a Iehova, e tia ia i te vai-maite-raa. Halelu Ia.

MAHANA MAHA MATAMUA

Te Tamaiti Arii

I te hoê tau te haere ra te hoê tamaiti arii, e to'na mau apee, i te hoê oire atea, e i to ratou haereraa na roto i te hoê uru raau ua taparahihia ratou e te hoê nănă eiâ tei haru i te tamaiti arii e ua afai tîti ia'na. Ua iritihia to'na mau aahu nehenehe, e ua faatapuhia oia i te vahie, tietie i te pape e ia rave i te mau ohipa atoa e ravehia e ta ratou iho mau tamarii ra.

Faaroo ihora te tavana o te oire i taua parau ra i te mau taata te parahi i taua uru raau ra, tonono atura oia i te faehau tei tiahi ê atu i te nānā eiā, e ua afai mai ratou i te fare

o te tavana te mau tamarii atoa tei haruhia e ratou i roto i te puhaparaa.

Faaite atura te tamaiti arii ia'na iho i te mau faehau, e ua haamauruuru oia ia ratou no to ratou faaoraraa ia'na. Area, te mau tamarii o te mau taata eiâ ra, ua faito noa to ratou ino i to to ratou mau metua. E i te taime a parau ai te tamaiti arii mau i te mau faehau, pii maira te hoê o ratou,

“E haavare ta'na. E ere oia i te tamaiti arii. O vau ia te tamaiti arii.” Parau maira te tahi, “Aita, o vau te tamaiti arii.” E ua na reira atoa te tahi pueraa. I taua taime ra ua repo roa te tamaiti arii mai te tahi pueraa tamarii, e e aahu motumotu atoa hoi to'na. Aita hoi te hoê taata, i roto i te oire, i ite faahou i taua tamaiti arii ra mai to'na nainairaa, e aita hoi te mau faehau e taa ra e nafea.

Area râ, te tavana o te oire ra, e taata paari e te maramarama hoi. Titau atura oia ia afaihia mai taua mau tamarii atoa ra i mua i to'na aro. E i muri a'e i to'na hi'o maitairaa ia ratou, haere atura oia i te tamaiti arii mau e parau atura, “E Tau Fatu, ua ite au e, o oe iho â te tamaiti arii mau, no te mea, e au noa iho oe i te hoê arii ia tia mai, e ua ite atoa vau e, e tamarii tera pueraa na te mau taata eiâ, no te mea ia haere ratou ua faito ia i te huru o te taata eiâ.”

MAHANA MAHA PITI

Te Reo o te Atua

Ua faaite a'enei te hoê taata paari i te hoê ohipa i tupu i to'na apîraa, oia hoi, ua na ô mai oia: “I te hoê mahana, i to'u tamariiraa, te haere ra vau i te fare, na te aua faaapu mai i pihaiho i to'u metua tane, ite atura vau i te hoê honu i roto i te hoê apoo pape papau, e a faaineine ai au ia'u no te tairi ia'na i te raau, faaroo ihora vau i te hoê reo, i roto ia'u iho, i te na ô raa mai e, ‘E mea hape tena.’ Tia noa ihora vau ma te raau i faateiteihia e a maere noa'i i te huru ê i tupu i nia ia'u ua moe noa'tu taua honu ra ia'u.

“Haere oioi atura vau i te fare, e ua ui au i to'u mama e, ‘Eaha tera mea tei parau mai e, ua hape au?’

“Rave maira oia ia'u i roto i to'na na rima e parau maira oia, ‘Te parau nei te tahi mau taata e, o te aau, area, o vau nei, e mea au a'e ia'u ia parau e, o te reo o te Atua i roto i te varua o te taata. Mai te mea e faaroo oe ia'na, e e haapao i ta'na parau, e puai atu ta'na parauraa mai e e aratai noa oia ia oe na nia i te e'a tia. Area râ, ia turi atu to taria ia'na, e a ore râ, ia haapao ore oe ia'na, e haamoe mārū noa oia ia'na, e i te hopea e vaiiho-noa-hia oe i roto i te poiri ma te aratai ore.’”

MAHANA MAHA TORU

Te Arero Iiti Uteute

I te hoê tau te ora ra te hoê arero iti uteute. E fare iti uteute nehenenehe maitai to'na, e na apaparaa niho uouo tei faataahia ta ratou ohipa, oia hoi, ia piri maitai ratou ia ore te parau ino a taua arero iti uteute ra ia haere i rapae. Area râ, ua haapao ore taua mau niho uouo ra i ta ratou ohipa, e ua au-ore-roa-hia te fatu o taua arero iti uteute ra, oia hoi te hoê tamahine iti, o Emma to'na i'oa, e te mau taata atoa, e no te rahi o te au ore ia Emma, aita te mau tamahine e faatia ia hauti oia e o ratou, e a ore râ, ia faaroo i te mau aamu ta ratou e faatia haere i te mau taime aita i au no te hautiraa; no reira, ua rahi roa te parau iriâ i parauhia e tana arero iti uteute ra, e ua rahi atu ta'na tama'iraa i te tahi noa'tu arero.

I te hoê mahana, a parahi noa'i o Emma i nia i te hoê parahiraa i raro a'e i te hoê tumu raau ma te mataitai noa i te tahi mau tamarii i te hautiraa, ua rohirohi te arero iti uteute i te parauraa i te parau au ore aita hoi i faarooohia, no reira, faaea ihora i te parau. Faaroo ihora o Emma i te hoê reo iti i te parauraa, "Emma!" Hi'o atura o Emma e ati noa a'e, i nia e i raro hoi, area, aita oia i ite i te hoê taata.

Parau maira taua reo ra, "Eita oe e ite ia'u," mai te mea ra ua ani atu o Emma, "Teiheia oe?"

"Tei roto vau i to oe mafatu. Ua haere mai au no te parau atu ia oe na e, e ere oe i te mea ino mai ta ratou e parau ra, area râ, o tena arero iti uteute o oe na. I teie nei, a tamata na i te faaore i taua peu ino a'na ra i te parauraa i te parau iriâ, te parau ino e te parau haavare, e i te mau taime atoa e na reira'i oia, a hohoni maitai oe ia'na a faaue ai ia'na ia parau i te hoê mau parau maitai a hi'o atu ai i te huru ê e faatupuhia. A haamana'o i teie, 'E mea paari mau te tamaroa e te tamahine o te tamata i te faatere i to'na arero.'

Mana'o ihora o Emma e, e parau maitai roa te reira.

Noa'tu i te ino o to'na arero iti uteute ra, e tamahine paari mau ra o Emma, e ua mana'o ihora oia ia tamata i taua ravea ra. Tamata itoito atura oia ma te itoito e pepe roa a'e-ra taua arero iti uteute ra na mua a'e i to'na mâtauraa i te parauraa i te parau maitai i te taata atoa ra, e ua haapii oia i te reira i te taime tano maitai.

MAHANA MAHA MAHA

To Tihoni Iteraa i to'na Mama

E tamaiti matapo o Tihoni, oia hoi, aita e tia ia'na ia hi'o i te hoê mea, e au e, ua tapirihia to'na mata i te mau taime atoa. Ua fanau-matapo-hia oia, e aita oia i ite i teie ao nehe-nehe, aita oia i ite i to'na fare e to'na mau hoa hauti, e aita atoa oia i ite i to'na mama. I te taeraa i te ono o to'na matahiti mana'o ihora to'na mama ia afai ia'na i te hoê taote ia raauhia to'na na mata e ia ite oia. Ani atura to'na mama ia tauturu mai to tatou Metua i nia i te ra'i e ua na reira atoa o Tihoni. E i mua a'e i te tapuraa ua ani raua i te Episekopo e te hoê taeae ia haere mai, e ua faatahinu raua ia'na, haamaitai atura, e ani atura ia tauturu mai te Metua i te ra'i ra i te taote ia maitai te mata o Tihoni. E ua tauturu mai te Metua i te ra'i i te taote, no te mea, i muri i ta'na tapuraa i te mata o Tihoni ua parau oia e, e mea maitai roa to'na mata e e ite iho â oia.

Ua taamuhia te mata o Tihoni no te tahi nau mahana, e i te hopea, tae maira te taime ta te taote i mana'o no te iritiraa i te taamu ia tia ia Tihoni ia ite i teie nei ao nehenehe. Tei roto atoa i te piha o Tihoni, te taote, to'na mama e te Episekopo. Iritihia'tura te tapoi mata o Tihoni. I te haamataraa ua mātā'u oia i te araara i to'na na mata—e au e ua anaana roa te maramarama.

Na ô atura te Episekopo, “E Tihoni, teie to oe mama.”

I reira haru atura oia i to'na mama ma te parau, “E Mama, o oe mau anei teie?” Eaha te huru o te oaoa o Tihoni i te reira taime.

I reira tuturi ihora o Tihoni, to'na mama e te Episekopo i raro e haamaitai atura ratou i te Metua i te ra'i i te mea e, ua ite Tihoni. E i te otiraa o ta ratou pure, ua hi'o Tihoni i to'na mama, e te parau matamua ta'na i parau o teie ia, “I teie nei râ e tia ia ia'u ia tauturu ia Mama.”

MAHANA MAHA HOPEA

Na te orometua iho o te Paraimere e imi i te hoê haapiiraa au maitai no te reira mahana.

TE PURE

E MEA pinepine roa te tupuraa o te mana'o i roto-pu i to matou mau hoa êê ra, Nafea te Atua e faaroo ai i to tatou mau pure, e nafea Oia e ite mai ai ia tatou mai te mea ua tia ta matou haapiiraa, e tino to te Atua mai to tatou iho nei te huru e te hoho'a? E ere râ te reira i te mea fifi roa ia feruri maitai tatou. A tamata na tatou i te faatopa i te hoê ofai i roto i te hoê apoo pape, e itehia te mau are pape i te haereraa'tu ma te faaati noa i te vahi i faatopahia'i te ofai. Hoê â huru te mata'i ta tatou e huti nei, ia faatopahia te ofai, e purara te mau are mata'i ite-ore-hia i te faaatiraa i te vahi i topahia e te ofai, e na te harururaa o te are mata'i i roto i te taria e faatupu i te maniania ta tatou i faaroo, e ia parau te hoê taata, ua faatupu oia i te are mata'i te haruru i nia i to tatou taria, e e faaroo tatou ia'na. Eita râ te are mata'i e tae i te atea roa, maori râ, ia puai roa'tu te harururaa o te are mata'i.

Te faaite nei râ te mau feia paari o te ao nei e, te vai nei te uira i roto i te reva nei; te vai atoa nei te mau are uira, no reira te manuïaraa o ta tatou mau radio. Ua hamanihia te hoê matini te faatupu te are uira i roto i te reva nei ia himenehia, e a ore râ, ia paraparahia i roto i te reira. E ia hinaaro tatou ia faaroo i te himeneraa, e a ore râ, te paraparahia, e faatano tatou i ta tatou radio i te vahi tano no te faariiraa o te are uira i roto, e no te mea, te vai nei te hoê mea i roto i te radio mai te taria te huru, e faaroo te taria radio i te haruru are uira, e na te radio e faatupu te are mata'i i roto i te reva, e na te haruru are mata'i tatou e faaroo ai i te himeneraa, aita râ te are uira ana'e e faatupu i te harururaa i nia i te taria, ia tano maitai râ te radio i te hamanihia e te faatanohia, e faaroo tatou i te mau vahi atoa no te ao nei, noa'tu te atea.

I teie nei taime, ua hamani-atoa-hia te hoê huru radio o te faaite mai te hoho'a o te mau taata te faatupu i te are uira i roto i te radio. Eita râ te hoho'a e tae i te vahi atea roa ra, na te mau vahi huru fatata râ, ua nehenehe roa te mau hoho'a. Te mana'o nei te feia hamani radio e, eita e maoro e tae atu te mau hoho'a nehenehe i te mau vahi atea roa ra o te ao nei.

No te Atua mai te ite e te paari atoa o te ao nei, aita'tu â e vahi e roa mai ai te reira. Na'na te ra'i, e te fenua, e te tai i hamani. Na'na atoa i hamani i te ravea no te faatupu-

raa i te are pape, te are mata'i, e te are uira, aita râ Oia i faaea i reira. Ua hamani atoa Oia i te hoê ravea ia ite tatou i te maramarama o te mahana, e te ava'e, e te mau fetia, oia hoi, na roto mai i te are mori e ite tatou i te maramarama. Aita'tu te hoê ravea, maori râ, te reira. No te hautiutiraa o te are mori i roto i te mata e ite ai tatou e, e fare matie, e a ore râ e puaahorofenua ereere, e a ore râ e pahi uo-uo. E mea tere a'e te are mori i te are uira; ua faitohia te reira tere e te feia paari, e te na ô mai nei ratou e, e purara te are mori e 186,284 maire i te setoni hoê ra.

Te na ô atoa mai nei te feia paari o te ao nei e, te vai nei te tahi are tere roa'tu i te ao nei, e te ao atoa ra, tei parauhia are etera (ether) e ratou ra. No teie nei roa râ to ratou iteraa i te vairaa o te reira mea. Ua na mua roa to te mau peropheta iteraa i te vairaa o te reira huru mea. Teparaunoarâ ratou e, o te varua te reira o te Atua, (Eiaha te Varua Maitai, e mea ê te Varua Maitai) te varua o te Atua iho ra, e na roto i taua huru mea ra e faauru ai i te aau o te mau taata atoa tei parahi i nia i te ao nei ra, mai te matamua mai â e tae noa mai i teie nei mahana. E faauru mai hoi o Iesu, i te Varua Maitai, ia tatou paatoa na roto mai i taua huru are ra, mai ta tatou e taviri te radio i te vahi no Farani, e roaa mai to Farani, e ia tavirihia te radio i nia i to Marite, e roaa to Marite, no reira, ua tia roa ia matou ia parau atu i te mau taata atoa e, e hoho'a taata to te Metua e to Iesu atoa, mai te au i tei faaitohia i roto i te Genese 1:26-27 e te Luka 24:39-40.

Noa'tu e, mai te mea e parahi te Metua i nia i te hoê fetia atea roa ino, ua tia roa ia Ia'na ia parau mai ia tatou, na roto mai i te harururaa o te mau are, e e faaroo tatou i To'na mana'o mai te mea na tia to tatou iho mau aau no te fariiraa e te haruraa o te mau are, oia hoi, te varua o te Atua. E mai te mea te hinaaro nei tatou ia parau atu i te Atua, te vai nei te hoê ravea, oia hoi, na roto atu i te pure. Ia faatanohia râ te aau na mua e tia'i. I reira e tere atu ai to tatou mau mana'o maitai i nia i te are e tae roa'tu i te vahi i faaeahia e te Metua ra. Ia ore râ tatou e faatano te aau i nia i te tia, eita roa'tu to tatou pure e tae atu, e eita atoa Ta'na pahono e haruru mai i nia i to tatou aau.

No reira, eiaha tatou e pure ma te feruri ore, e haamau'araa taime ia.

Te Ohipa Rahi No Te Mau Metua

F HAAPII i te tamaiti i ta'na e'a ia hacre ra; e ia paari oia ra, e ore e faarue i ta'na e'a ra. Mase-li 22:6.

Ua na ô maira Iesu e, “E ara o te vahavaha outou i te hoê o teie nei mau taata rii, e faaite papu atu ra vau ia outou, o ta ratou mau melahi i te ao ra, e tia ia i te hi'oraa'tu i te mata o ta'u Metua i te ao ra.”

Ua heheuhia mai e te Atua te hoê na parau faaara ra ia tatou, na roto i to'na peropheta ia Iosepha Semita. Te na ô maira taua heheuraa ra, “Mai te mea e tamarii to te mau metua * o te ore e haapii atu ia ratou ia ite ratou i te parau no te tatarahapa, e no te faaroo i te Mesia, te Tamaiti a te Atua ora, e no te bapetizoraa e te horoaraa o te Varua Maitai na roto i te tuuraa i te rima, ia tae ratou i te vau o to ratou ra matahiti, i nia ia te reira hara i te upoo o te mau metua. B. F. 68:25, 26.

E ua na ô atoa mai oia i roto i te hoê faaueraa ia tatou nei, “Ua faaue atu râ vau ia outou ia haapii atu outou i to outou mau tamarii i te maramarama e te parau mau. B. F. 93:40.

I roto i te hoê episetole a Paulo i to Ephesia ra, ua faaue atu Paulo ia ratou, “O outou, te feia metua ra, eiaha e faaooo atu i ta outou mau tamarii ia riri, e haapii râ ia ratou e ia paari ma te a'o a te Fatu ra.”

E i roto i ta'na parauraa'tu i to Kolosa, ua na ô atu oia e, “E te mau metua ra, eiaha e faariri atu i to outou tamarii, o te taiâ hoi ratou. E te mau tamarii râ, e faaroo i to outou mau metua i te mau mea atoa nei, e mea mauruuru hoi te reira i te Fatu nei.”

Parau maira o Solomona e, “E a'o atu i to tamaiti oi vai a'e te fariuraa; e eiaha oe e faaherehere ia'na a pohe oia ra”, oia hoi, “Eiaha te mau metua e vaiho noa te raau tairi, ia hape to tamaiti e faaafaro ia'na ra i to'na apîraa, no te mea e, aita oia i paari i roto i ta'na mau peu hape, e ia haapao

maitai oia i to'na apiraa. Eita ia oia e faarue i ta'na mau haapiiraa ia paari oia, e na te papai e na te a'o e haapaari atu ia'na ra.

I roto i te hoê haapiiraa ta Iesu i haapii atu i ta'na mau pîpî, ua ui atura oia ia ratou e, "O vai ia metua i o outou nei e hopoi atu anei i te pata?" Te tiaturi noa ra te mau tamarîi i to ratou mau metua no te faaiteraa mai i te mau mea atoa te au na ratou. E teie nei, o outou e te mau metua na, Eaha ia te mau mea ta outou e horoa'tu i to outou mau tamarîi? e ophi anei? e a ore ra, te ite anei, e te paari anei? Te faaite nei anei outou, ia ratou, i te e'a afaro na roto i to outou iho haapaoraa?

Papathia e Nile, N. R. Chugg

Te Tumu No To Tatou Vairaa

TE tumu no to tatou vairaa i nia i teie nei ao, ia rave noa â ia tatou i te hinaaro o to tatou Metua i te ra'i ra, mai te au i tei ravehia i te ao ra, oia hoi, ia faaore tatou i ta tatou mau hara e ia tuu i te reira i raro a'e i to tatou mau avae. E faaore tatou i to tatou mau hape, e na roto i te faaururaa o te Atua e riro ia tatou ei mau tamarîi e ei mau tavini no te Atua i nia i te ao nei.

Ia faaoti tatou i ta tatou ohipa i nia i te ao nei e tia'i.

Ua tono te Atua i ta'na Tamaiti here i nia i te ao nei ia faaora ia tatou i te pohe mure ore, e ua na reirahia e Iesu Mesia. Oia ia, ua tono te Atua i te mau taata paatoa i nia i te ao nei no te hoê noa iho ohipa. E aita i nehenehe ia tatou ia rave i taua ohipa ra ma te rave ino e te paruparu, e te ite ore hoi.

No reira, e mea tia ia haapii tatou i te mau mea atoa e te mau faufaa i tuuhia mai ia tatou nei e te Atua. Ia ite papu tatou i teie nei mau mea, ei reira e nehenehe ia ia tatou ia rave mai te au i tei faauehia e te Atua, e e tupu tatou i te parau paari e te ite no te Atua. No te mea e, ia rave noa tatou i te ohipa no te faraoa o teie nei ao, e mea iti roa te tai-me ta tatou e imi i te faraoa no te ora mure ore.

E nehenehe noa i te mau tavini a te Atua ia poro haere i te Evanelia e te parau mau i te mau taata o te ao nei e ia faaite atu ia ratou i te raveraa maitai no te haereraa i te ora. E ia faaroo ratou i te a'oraa a te mau tavini a te Atua, na ratou iho e imi i te e'a o te ora mure ore, e tomo i roto i te Basileia o te Atua, e e noaa ia ratou ta ratou iho utua. No reira, eita e tia i te hoê taata ia faaora i te tahi taata, tei ia'na ta'na ohipa, e tei ia'na iho te utua no te reira.

Aore e tia ia faaore i te hara a te hoê taata, maori râ ia tatarahapa oia. Eita roa e tia i te hoê taata ia haaparari i te fifi no te pohe, maori râ ia fanau faahou oia mai ta te Atua i faaue atu, e ua faaitehia te reira i te ao nei e ta'na Tamaiti, a parahi ai Oia i nia i te ao nei. E ua faaite faahouhia te reira, na roto ia Iosepha Semita, i teie nei anotau. Na roto ana'e i te parau-tia e faatia-faahou-hia'i tatou ia farii i te hanahana o te Atua. No reira, ia tatarahapa tatou, e tia'i, e ia haere tatou i roto i te maramarama o te mori, no te mea o Iesu ia te mori e te maramarama o te ao nei.

Ia tauturu tatou te tahi i te tahi, e ia aroha i to tatou tata-tupu e to tatou enemī atoa hoi, mai te au i tei papaihia i roto i te Bibilia. I Korinetia pene 13.

Oia mau, e faito tatou i to tatou mau taeae mai te au i to ratou mau hinaaro e ta ratou ohipa maitai. Eiaha tatou e faito ia ratou mai te au i to ratou mau hape e ta ratou mau hara. E ia imi noa tatou i te parau-tia, e te aroha, e te mau mea maitai i nia i te ao nei, ei reira e farii ai tatou i te mau haamaitairaa no te Atua.

Papaihia e Etera, E. T. Benson

PARAU API NO TE MISIIONI

I roto i te ava'e no Ditema i mairi a'enei, ua tae mai o Tihoti â Timo, te tauturu hoê no te Peresideni Amaa i Fakarava, i Papeete nei. e ua faaite mai oia e, te itoito noa ra te mau taeae e te mau tuahine, no taua Amaa ra, i roto i te ohipa a te Fatu.

Ua tae mai i Papeete nei to tatou taeae o Temorere â Tagia, na Taega mai, e te tumu o to'na tere, oia hoi, te imiraa i te hoê faurao no te haereraa i to'na fenua ai'a, oia hoi, i Takaroa, e i te taime e tai'o atu ai outou i teie nei parau, tei roto ia oia i to'na utuafare, no te mea ua manu'a roa oia i to'na taeraa mai i Papeete nei.

I te 30 no te ava'e Novema i mairi a'enei, ua tae mai i Papeete nei te mau orometua ra o Rutena, R. O. Allred, e o Teremera, D. W. Braegger, no Hikueru mai, e o Re, O. R. McEntire, raua o Noromana, N. F. Price, no Hao mai.

I roto atoa i te ava'e no Ditema i mairi a'enei, ua tae atoa mai i Papeete nei te mau orometua ra o Viliamu, R. W. Young, e Horate, H. G. Wilde, na Borabora mai, o Viri, W. H. Miller, e o Eledona, E. A. Peterson, na Ragi-roa mai, o Nile, N. R. Chugg, e o Lavora, L. C. Chapman, na te mataeinaa mai, o Iosepha, J. G. Stevens, o Pereti, P. B. Asay, o Peterona, Y. L. Peterson, e o Ri, R. L. Halverson, na Faaite mai. E te tumu no to ratou taeraa mai, o teie ia, no te Amuiraa no te mau Orometua hou ratou e purara faahou ai i to ratou mau vahi ohiparaa.

Ua tae atoa mai i Papeete nei i roto i te ava'e no Ditema i mairi a'enei o Teriki Mataifano â Gariki, te tauturu piti no te Peresideni no te Mataeinaa i Nia no te Tuamotu, e ua faaite mai oia e, te rave itoito noa ra te mau melo no te Amaa i Marokau i te ohipa a te Fatu, e te haere noa ra te ohipa Evanelia i mua i te reira paeau motu.

I roto atoa i te ava'e no Ditema i mairi a'enei, ua haere poto noa mai i Papeete nei o Tefau â Tumahani, te tauturu hoê no te Peresideni no te Amaa i Nibiru.

PARAU API ORO'A

FAATOROARAA

I'OA	TOROA	MAH. FAAT.	AMAA	NA VAI I FAATOROA
Turumakitepo â Punua	Diakono	4-6-39	Hikueru	Pereti B. Asay
Turumakitepo â Punua	Haapii	6-10-39	Hikueru	Kehauri â Tumahani
Tekehu â Fareata	Tahu'a	6-10-39	Hikueru	Tamariki â Fareata
Tetua Mohi â Fareata	Peresi.	22-10-39	Amanu	Re McEntire
Kahera Tu â Ganahoa	Diakono	22-10-39	Tauere	Tetua Mohi â Fareata

BAPETIZORAA

I'OA	MAT.	MAH. BAP.	FENUA	NA VAI I BAPETI.
Hamau Vaituaerogo â Naea â Faremata	29	5-11-39	Hikueru	Rutena Allred
Manuia â Tehio	22	22-10-39	Amanu	Re McEntire
Marama â Fatupua	11	6-8-39	Anaa	Rutena Allred

FANAURAA

Teriirere Gahono Gaitua â Tetuanui, v., 16-7-29, Hikueru; m. t. Tetuanu â Tevivirau, m. v. Haapaua Teumere â Tupaua.

Harry Opuaraino Narii â Temanaha, t., 20-9-39, Hikueru; m. t. Pou â Temanaha, m. v. Tuputeata â Sue.

FAAIPORAA

Kahera Tu â Ganahoa, t. e o Manuia â Tehio, v. i Amanu i te 21-10-39.

TE HURU PAPU O TEIE TAMA'I

Ua rau te huru i mataitaihia e to te ao nei i teie mau mahana i mairi a'e-nei. E na taua hoi mau huru ra e faaite papu mai e, ua tapitapi, ua hepo-hepo e ua teimaha te faatereraa Hau Purutia a Hitler e te nunaa Purutia iho hoi.

Ua tai'o a'enei hoi tatou e, ua faaineine papu taua faatereraa Hau Purutia ra mai mua roa mai i te nuu e i te mauihaa tama'i no te haavi, no te aa, e no te haamata'u i te mau Basileia atoa te reira te faatereraa mana huiraatira.

Te tumu i na reira'i taua faatereraa Hitler ra, ua ite to te ao nei - Ua tai'o atoa tatou i te reira.

A toru ava'e e na mahana te maororaa i teie nei te tama'i Farani-Paratane ia Purutia.

I roto i taua taime ra ua tama'i i nia i te fenua, ua tama'i na nia e na raro i te tai, e ua tama'i hoi na te reva.

I nia i te fenua ua tamatamata mai te nuu Purutia i to tatou nuu i tera e i tera taime mai te opua te enemi e na mua te fafa hou a faa'u puai mai ai, mai tei opuhia e te mau upoo faatere nuu Purutia ra.

Aita roa taua mau fafaraa ra i manuia e ho'e iti noa'e, no to mea ua ati te mau nuu omua o te Purutia i te huru o te raveraa a te nuu faehau - a te mau pupuhi mitaraie e a te nuu pupuhi fenua Farani.

I nia i te moana; aita nei a hoi e aroraa rahi pahi tama'i i tupu, no te mea, aita nei a te nuu moana Purutia i haere i rapae i Purutia.

Mea varavara te faarohia e, tei rapae ho'e, e a ore ra, e'piti pahi tama'i Purutia o te tamoemoe noa i te pahi auahi puai navai ore e i te pahi no te mau Basileia hara ore.

O te ohipa topita pahi a te nuu pahi Purutia hopu na raro tei pinepine te tupu mai ta tatou hoi i faaroo e i tai'o ra.

Te varavara noa'tu ra te manuiaraa o te reira huru no te mea, ua itoitoe te nuu moana Farani e Paratane no te arai i te reira.

Ua manuia e te manuia noa ra te arairaa a te nuu moana Hau Amui na roto i te rahi o te sous-marins Purutia i ati e a ati noa ra.

Te parau hoi no te tama'i na te reva - oia hoi, te tama'i pahi Maue Avion. Ua pinepine te reira huru aroraa e to te enemi te manureva i rahi i te ati.

Ua faaroo atoa tatou i ta te radio faaiteraa, e ua tai'o hoi tatou atoa i ta te ve'a faaite-atoa-raa i taua mau huru ra.

A toru ia huru tama'i manuia ore roa no Purutia.

A toru ia huru tama'i manuia roa no Farani e Paratane.

E parau papu hoi teie - no te mea ua papu atoa ia Purutia taua huru ino no'nara - e no reira, ua imi Purutia i te ravea topita haapainu na te moana.

Ua haapainu hanoa hoi Purutia i te topita haaparari pahi e te haapohe taata hoi mai te feruri ore i te mau pahi o te mau Hau tama'i ore i rahi atoa i te ati.

Ua tuu hoi Purutia i te reira ino na te moana mai te haapao ore e te faa-

tura ore i ta'na iho tãpũ i mua i te mau Basileia atoa o te ao nei a faaoti ana'e ai i te parau fafau no te opani i taua peu ra o tei feruribia ei ino no te ao taatoa.

E taa noa atoa ia tatou ia feruri e, e ere mau â tera ohipa haapainu topita na te moana i te peu tiamã, i te peu maitai e te peu aito.

No te mea e painu hanoa te reira ino na te mau vahi atoa e afaihia e te opape, e te mata'i, e te are miti.

E no reira ua mata-ê-hia e ua enemihia Purutia e to te aotiamã atoa nei.

O Purutia ana'e atura i to'na tiaraa i teie taime na roto i ta'na mau huru ino i ueue na nia i te mau nunaa rii ravea ore.

Area, i teie nei atoa—te huru ore atura te huru horuhoru rahi i mua a'enei o te mau nunaa Honeteria - Rumania - Bulutaria - Yougoslavia - Turetia.

I vai ri'ari'a noa na taua mau Basileia rii ra i mua a'enei—no ta ratou ravea ore i mua i te faatereraa a Hitler ia Purutia na roto i te puai ineine, taparahi taata, haavare, eiã, hamani ino, totoã, aitahunahuna, haavarevare, nounou, e te aroha ore.

O Itaria hoi, te Basileia o tei amuitahi ia Purutia i mua a'enei ra, ua faaatea atoa hoi ia i teie nei ia Purutia.

Te tabi tumu no te hairiiri te Itaria i ta Purutia mau peu—e no te ta-hoêraa Purutia ia Rutia.

Mai te huru râ ia e—e taata maramarama roa a'e Mussolini, te upoo o Itaria, ia Hitler te upoo o Purutia.

Ua feruri atoa Mussolini, e to raro a'e ia'na e, e pau atoa Itaria i te na-naohia e Hitler, ahiri ta'na mau opuaraa i manuã, e ahiri Farani e Paratane e aita i faaetaeta.

E auua maoti Daladier e Chamberlain i faaetaeta i faufaa ore roa'i ta te faatereraa Purutia a Hitler mau opuaraa faatitĩ i to te ao nei.

E auua atoa te mana'o itoitoe o te nunaa Farani e Paratane o tei paturu paari maitai atoa i te feruriraa ara e te ora a Daladier e Chamberlain.

E auua atoa te mana'o ara vare ore e te faatereraa Hau Farani e te faatereraa Hau Paratane i tano roa'tu ai.

E auua mau hoi e, te vai mure ore noa ra i roto i te aau auri faira o te nuu faehau Farani te huru aito tumu no mutaa iho roa mai.

E auua roa atoa hoi te mana'o paturu anaanatae atoa o te mau nuu aihuaraau Farani o tei here papu i to ratou Ai'a e i to ratou Hau Metua.

O te huru atoa ia o te Paratane e to te mau Aihuaraau Paratane.

Eiaha râ tatou atoa e haamoe e, auua atoa te aravihi tiaturibia e tatou, e to te ao taatoa nei, oia hoi, te faehau numera hoê o Farani ra, oia hoi, GAMELIN.

O Gamelin te upoo faatere e te ora o te nuu faehau Farani e Paratane.

O Gamelin te Tenerara rahi i nia a'e i te mau tenerara atoa o teie tama'i.

Tei nia ia Gamelin te mata, te mana'o e te tiaturiraa o te mau nunaa atoa o tei hinaaro ia vai papu noa te oraraa maitai.

Tei roto i te rima o Gamelin te hoe faatere o te nuu e amo ra i te mau huru atoa no te faa-upootia-raa i te parau-tia e no te faatumuraa i te oraraa faatitii ore.

E e ere hoi taua oraraa ra e, e no tatou ana'e—no te nunaa Purutia atoa hoi.

No te mea o te maitai o te mau nunaa atoa—o te arairaa i te mau ino atoa te tutavahia ra e Farani e Paratane.

E, e oia mau teie—no te mea ua itehia te huru o Farani e o Paratane e to tatou mau tupuna, e to tatou mau metua, e tatou atoa hoi.

E, e parau mau roa hoi teie, no te mea, ua ite te mau nunaa atoa o te ao nei i te huru rima faatere maitai o Farani e Paratane, i o raua iho, e na nia i te mau nunaa tei reira to raua reva, ta raua ture e ta raua huru faa-tereraa.

E te tapao faaite papu roa ia tatou e, e nau Basileia here nunaa mau Farani e Paratane i te taata atoa ra; o te huru faahiahia rahi e te tia rahi o ta raua huru tahoo ia Purutia no ta'na mau peu ino rahi.

Aita Farani e Paratane i feruri i te tahooraa haapohe taata—ua feruri râ raua i te ravea ia haafaaea oioi i te tama'i.

E taua ravea ra, o te tapiti ia i te tahatuaraa ia Purutia.

Te tahatuaraa matamua a Farani e a Paratane ia Purutia, mai te haamataraa mai o teie tama'i: o te faaapiapi roa e te haru i te mau huru ohipa atoa e na rapae atu nei te haere i Purutia.

Te piti o te tahatuaraa a Farani e a Paratane, o te faaapiapi atoa e o te haru atoa, i teie nei, i te mau huru ohipa atoa e na Purutia te haere i rapae.

Ua taa noa atoa ia tatou e, eaha te huru e tupu mai na roto i taua tahatuaraa.

E tupu iho â ia te veve, te ati poia, te ati paruparu e te ati faufaa ore i Purutia.

No te mea eita e tae faahou i Purutia te mau mea i hinaarohia no te oraraa e no te tereraa papu o to'na puai tama'i.

E, e oia mau iho â; no te mea ua parau Hitler i na mahana i mairi a'e-nei, i to'na Hau e i to'na nunaa e, "E pohe Purutia mai te mea e, e ore ta Purutia ohipa poroi e te hoo tao'a."

Ua parau atoa Goering, te Tenerara rima atau mau o Hitler e, "Mai te mea e, e manuia ta Farani e ta Paratane tahatuaraa—ua hue Purutia."

Ua parau te mau ona Purutia rarahi o te mau hamaniraa ohipa rau i Purutia e, "A haapeepee te nuu Purutia i te titau i te rê i nia i te Farani e te Paratane. E mai te mea e, eita te reira e tupu ra, a haapeepee Purutia i te ani ia Farani e ia Paratane e, ei hau teie tama'i."

RURU

Te hoo: e 5 farane i te matahiti; e 10 fr. no na matahiti e 3.

Neneihia i roto i te Piha Neneiraa a te Ekalesia a Iesu Mesia I Te Feia Mo'a i Te Mau Mahana Hopea Nei, Papeete, Tahiti.

Marcel Bonnet Gérant. K. R. Stevens, Imprimeur. Uel C. Hunting, Editeur.
Rue Dumont d'Urville, Orovini, Papeete, Tahiti.